



Inatsisartunut ilaasortaq, Siverth K. Heilmann, Atassut

Kangerlussuaq pillugu § 37 naapertorlugu apeqquaqammut 2018-178-imut akissut

28-08-2018
Suliaq nr.:2018-15482
Allakkiaq nr. 32587686

Asasara Siverth K. Heilmann

Inatsisartut suleriaasianni § 37 naapertorlugu apeqquaqatinut nassiussanut qjanaq. Apeqqutit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Tamatumunnga tullinguullugu ajuusaarutigaa, apeqqutit saqqummiunneqartut tamakkiisumik akineqartutut Atassutip misigisimangimmagit. Isumaqarpunga apeqqutit innersuussutigisatit tassaasimassasut, imm. IIA2018/21-p siullermeerneqarnerani Atassutip oqaaseqartartuata apeqqutigisai. Matumanilu § 37 naapertorlugu akissuteqaammut ilanngullugu Atassutip oqaaseqartartuata apeqqutigisimasai ilanngullugit akissavakka taakkualu siusinnerusukkut immikkut akineqarsimangimmata ajuusaarutigaa.

Apeqqut 1: Kisitsisit soq taamak nikerartiginerat, Naalakkersuisut paasissutissiissutigisinnaanerlugu?

Akissut: Piffissap ingerlanerani Kangerlussuarmi aningaasaleeqqinnissamut pisariaqartitat pillugit oqaaseqartoqangaatsiarsimammat ilumoorpoq. Misissueqqissaarnermi taaneqartumi missiliukkat nikerarput, misissueqqissaarnermi naatsorsuutigisat assigiinngitsut tunngavigineqarsimammata. Tamatuma saniatigut misissueqqissaarnermi missiliukkat nikerarput, Kangerlussuarmi aningaasaleeqqinnissamut pisariaqartitat pillugit paasissutissat nutaat nutartikkallu ingerlaavartumik pissarsiarineqartarsimammata. Taamaattumik naatsorsukkat nutaanerpaat nalinginnaasumik aningaasartuutit aamma teknikkikkut aaqqiissutissat periarfissallu pillugit siusinnerusukkut ilisimasanik, nutaanik nutartikkanillu ilaqtinneqartunik tunngaveqartarput.

Apeqqut 2: Kangerlussuarmi mittarfimmi aningaasartuutit inissianut, pilersuineranut, akunnittarfinnut il. II. aningaasartuutit soq ilanngunneqarnerisut Naalakkersuisut paasissutissiissutigisinnaanerlugit?

Akissut: Inuiaqatigiit aningaasaqarnerannut kingunerisassanik naliliinermi nunatsinni attaveqaatit aaqqissuussaanerisa saniatigut qinigassat arlallit saqqummiunneqarput. Periarfissatut ilusiliami tunngaviusumi ullumikkut pissutsit tunngavigineqarput. Periarfissatut ilusiliami tunngaviusumi maanna ilusiusut attatiinnarneqarnerini inuiaqatigiit aningaasaqarnerannut kingunerisassat naatsorsorneqarput. Periarfissatut

ilusiliani allani mittarfiit ilusaannik allannguinerup inuiaqatigiit aningaasaqarnerannut kingunerisassat takussutissiorneqarput.

Kangerlussuarmi akunnittarfiup ingerlatiinnarneqarneranut aningaasartuutit periarfissatut ilusiliani tunngaviusumi ilanngullugit naatsorsorneqarput, taakku maanna angallassinerup ilusaanut ilaammata, aammalu ingerlatiinnarneqarneranni inissiinissamut pisariaqartitsineq Kangerlussuarmi niuerfiit namminersorfiusut piginnaasaat sinnerlugit annertussuseqarmat. Kisiannili periarfissatut ilusiliani taamaattumi akunnittarfiup namminersortunit ingerlanneqartussanngorlugu tunineqarsinnaanera itigartinneqarsinnaanngilaq. Periarfissatut ilusiliani allani Kangerlussuarmi akunnittarfimmuut aningaasartuutit ilaatinneqanngillat, Imapik qulaallugu angallassinerup Nuummumut Ilulissanullu, namminersortut unnuiffissaqartitsinerisa piuraneqassutsimut naammannissaat naatsorsuutigineqartunut nuunneqarnissaa naatsorsuutigineqarmat.

Kangerlussuarmi pilersuinermut atortut maannatut ingerlanneqaannassappata, pisortat amerlasuunik aningaasaleeqqittariaqassapput. Tamanna aamma periarfissatut ilusiliani allani marlunni naleqqussaaffigineqarluni ilanngunneqarpoq. Taamaattumik aningaasaleeqqinnissamut pisariaqartitsiviusut taakku inuiaqatigiit aningaasaqarnerannut kingunerisassanik naliliinermut ilanngunneqarput.

Inuiaqatigiit aningaasaqarnerannut kingunerisassanik naliliinermut sulisunut inissianut aningaasaleeqqinnissamut aningaasartuutit ilanngunneqarput, aningaasartuutit taakku aamma pisortanit matussuserneqartussaassammata. Taakkununnga aningaasartuutissat misissueqqissaarnermi periarfissatut ilusiliani tunngaviusumi aamma periarfissatut ilusiliani allani assigiipput. Taamaattumik taakkununnga aningaasartuutissat periarfissatut ilusiliani pingasuusuni tamani assigiimmik artukkiisussaapput.

Taakku saniatigut periarfissatut ilusiliat allat aamma nuunnermut aningaasartuutinit missiliorneqartunit artukkerneqartussaapput, tamannalu periarfissatut ilusiliamut tunngaviusumut atuutissanngilaq.

Apeqquut 3: Illoqarfinni taakkunani sulisorisat inissaannut, attaveqaqatigiinnermut pioreersunut nutarsaanernut, akunnittarfinnik nutaanik pilersitsinernut, innuttaasunut illoqarfinnullu allanut takornarianut ingerlariaqqinnaveertunut inissiigallarfiit ilanngullugit aningaasartuutit mittarfinnut pilersaarutinit nutaaanut inuiaqatigiit aningaasaqarneranni misissuineranut ilanngunneqarnerlutik?

Akissut: Qaqortumi, Nuummi Ilulissanilu mittarfiliornissanut atatillugu matuma siuliani taaneqartunut aningaasartuutissat ilanngunneqanngillat, taakkununnga aningaasartuutissat namminersortut aningaasaliinerisigut matuneqarnissaat naatsorsuutigineqarmat. Aammattaaq apeqquut 2-mut akissut takuuk.

Apeqquut 4: Taamaassimangippat, inuiaqatigiit aningaasaqassusaannik tassani soq assigiinngissuteqartoqarnerisooq Naalakkersuisut paasissutissiissutigisinnaanerlugu?

Akissut: Periarfissatut ilusiliat pineqartut katiterneqarnerini assigiinngissut pilersooq. Tassalu periarfissatut ilusiliat tamarmik immikkut periarfissatut ilusiliani ataasiakkaani suut pisortat sanaartornermut aningaasaleeqqinnermullu aningaasartuuteqarfissaneraat isummerfigineqarpoq. Assersuutigalugu

Kangerlussuarmi ajornartoornermi inissiiinissamut aningaasartuutissat kisimik ilanngunneqarnissaat pisariaqartinneqarpoq, Nuummi Ilulissanilu namminersortut niuerfianni ajornartoornermi inissiiinissamut pisariaqartitsinerup naammassineqarsinnaanissaa naatsorsuutigineqarmat.

**Atassutip oqaaseqartartuata saqqummiussaa, apeqqut 1:
Anguniarneqarpa mittarfinni pioreersuni, massakkut timmisartut Dash 8
atorunnaarlugit siunissami timmisartut 19-iniinnarnik ilaasoqartartunik
atugaalernissaat?**

Akissut: Sullissisut siunissami atortunik atuinissaat pillugu Naalakkersuisut oqaaseqarsinnaanngillat. Tassalu silaannakkut angallasseqatigiiffiit kisimik atortut suut atorneqarnissaat pillugu aalajangiisinnaapput aalajangiisussaallutillu.

Kisiannili Naalakkersuisut paasinninnerat malillugu sullissisut atortunik atuinerminni timmisartuutiqatigiiffiup (taamaalillunilu ilaasut) aningaasartuutaasa aammalu ornigassamut pineqartumut tikittoqartarnerata akornanni naapertuuttumik oqimaaqatigiissitsinissaaq anguniartarpaat.

Taamaattumik angallavinnut ilaasukiffiusunut tunngatillugu timmisartunik mikinerusunik atuinikkut ornigassamut timmisartuussisarnerit akulikinnerulersinnaanersut, aamma/imaluunniit sullissisup, taamaalillunilu ilaasup assartuussineranut aningaasaqarneq pitsaanerusoq anguneqarsinnaanersoq naliliiffigissallugu naapertuutissasoq ilimanarpoq.

Assartuussinermut aningaasaqarneq ilaatigut pissutsinit ukunannga sunniuteqarfigineqartarpoq, tassalu

- timmisartut annerit ataatsimut isigalugit issiavimmut ataatsimut kilometerimut appasinnerusunik aningaasartuuteqarfigineqartarput (timmisartup iluani pisinnaasat naammaginartumik annertuppata)
- Timmisartup iluani pisinnaasat – tassalu inissanit atorneqarsinnaasunit qanoq amerlatigisut atorneqavittarnerisut.

**Atassutip oqaaseqartartuata saqqummiussaa, apeqqut 2:
Innuttaasut takornarissallu Nunatsinni amerlanerulernissaannik
angalanerulernissatsinnik pitsaanerusumillu kiffartuunneqarnissatsinnik
anguniagaqartilluta, tamanna Naalakkersuisut naapertuuttutut isiginerpaat?**

Akissut: Sullissisut angallavinni pineqartuni atortunik qanoq atuissanersut Naalakkersuisunit aalajangiiffigineqarsinnaanngilaq aalajangiiffigineqartussaananilu.

Kisiannili Naalakkersuisut isumaqarput, ataatsimut isigalugu angallaviit atortut naleqquttut atorlugit sullinneqarnissaat naapertuuttoq, taamaalilluni bilitsit akii sapinngisamik appasitsinneqarsinnaammata aammalu timmisartuussisarnerit sapinngisamik akulikinnerpaatinneqarsinnaammata.

Atassutip oqaaseqartartuata saqqummiussaa, apeqqut 3:

**Kommuune-ni suut kingunissaasinnaasut sulii ilisimanagit, inatsisartuni aalajangee-
reernissaq, isumaqatigiinniarneqarfigineqarnissaannik siunniussaqaarneq
pissusissamisoortut Naalackersuisuni isigineqarnerluni?**

Akissut: Apeqqut imatut paasineqarpoq, aalajangiinerup pineqartup kingunerisassai tamarmik sulii ilisimaneqalinngitsut, inatsisissatut siunnersuummik saqqummiussi-
soqarneratigut siusissukkut suliamik aallartitsisoqassanersoq apeqqutigineqartoq.

Inatsisissatut siunnersuutip saqqummiunneqarneratigut misissueqqissaarnermut tunngavissat suliarilluakkat naatsorsorluakkallu, inatsisissatut siunnersuutip politikikkut suliarineqarneranut, maanna Inatsisartut Aningaasaqarnermut Akileraartarnermullu Ataatsimiititaliami ingerlanneqartumut iluaqutaasinnaasut saqqummiunneqarnissaat Naalackersuisunut pingaaruteqarpoq.

Inuiaqatigiit aningaasaqarnerannut kingunerisassanik naliliisoqarnerani inerniliissutigineqarpoq, mittarfiit ilusaannik allanngineq inuiaqatigiit aningaasaqarnerat, taamatullu missingersuusiortarnermi aningaasaqarneq eqqarsaatigalugu Nunap Karsianut iluanaarutaassasoq, aammalu ataatsimut isigalugu maanna angallasseriaatsip ingerlatiinnarneqarneranut naleqqiullugu annertunerujussuarmik isumalluarnartoqartoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Simon Simonsen